

XVIII-Vigo-Baixo Miño.

Concello:

Baiona, Fornelos de Montes, Gondomar, A Guarda, Mos, Nigrán, Oia, Pazos de Borbén, O Porriño, Redondela, O Rosal, Salceda de Caselas, Soutomaior, Tomiño, Tui, Vigo.

XIX-Caldas-O Salnés.

Concello:

A Illa de Arousa, Barro, Bueu, Caldas de Reis, Cambados, Campo Lameiro, Cangas, Catoira, Cotobade, Cuntis, O Grove, A Lama, Marín, Meaño, Meis, Moaña, Moraña, Poio, Ponte Caldelas, Pontecesures, Pontevedra, Portas, Ribadumia, Sanxenxo, Valga, Vilaboa, Vilagarcía de Arousa, Vilanova de Arousa.

CONSELLERÍA DE PESCA E ASUNTOS MARÍTIMOS

Orde do 8 de febreiro de 2008 pola que se regula o control da descarga e do transporte dos produtos pesqueiros frescos ata a fase de primeira venda e o transporte de moluscos bivalvos, equinodermos, tunicados e gasterópodos mariños vivos.

O Regulamento (CEE) nº 2847/1993, do Consello, do 12 de outubro, e posteriores modificacións, polo que se establece un réxime de control aplicable á política pesqueira común, introduce no seu título II artigo 13 a obriga de que todos os produtos da pesca desembarcados ou importados na comunidade, e para os que non se presentase unha nota de venda, nin unha declaración de recollida, e que se transporten a un lugar distinto do de desembarque ou importación, deberán ir acompañados dun documento ata que se efectúe a primeira venda.

Así mesmo, o artigo 9 do citado regulamento comunitario establece que cando os produtos non se poñan á venda, ou se destinen a unha venda posterior, deberán presentarlles ás autoridades competentes unha declaración de recollida.

O regulamento citado na alínea anterior recolleuse na lexislación estatal mediante o Real decreto 2064/2004, modificado polo Real decreto 607/2006, polo que se ditan as normas para o control da primeira venda dos produtos pesqueiros, co obxecto de establecer a normativa básica en materia de ordenación do sector pesqueiro que lle atribúe ao Estado o artigo 149.1º.19 da Constitución.

O Decreto 419/1993, do 17 de decembro, polo que se refunde a normativa vixente sobre descarga, primeira venda e comercialización dos recursos mariños en fresco, modificado polo Decreto 101/2006, do 8 de xuño, establece que se o propietario das especies descargadas decide vender estas nunha lonxa ou centro de venda distintos do porto de descarga,

poderá facer o transporte das devanditas especies por vía terrestre ata a lonxa ou centro de venda de destino, coa obtención previa da guía de descarga.

O Regulamento comunitario 853/2004, do 29 de abril, polo que se establecen normas específicas de hixiene dos alimentos de orixe animal, establece no seu capítulo I sección VII que cando se traslade un lote de moluscos bivalvos, equinodermos, tunicados e gasterópodos mariños vivos entre establecementos, traslado que incluírá a chegada do lote ao centro de expedición ou ao establecemento de transformación, o lote deberá ir acompañado dun documento de rexistro.

Na Comunidade Autónoma de Galicia a explotación dos moluscos bivalvos, equinodermos, tunicados e gasterópodos mariños vivos atópase regulada a través de plans de explotación en que as organizacións asumen o control da produción, polo que, coa finalidade de adaptar e complementar a regulamentación estatal e comunitaria ao sistema de funcionamento desta actividade e co fin de garantir a rastrexabilidade do produto, faise necesario desenvolver un documento de orixe que recolla a produción a partir da zona de extracción ata a lonxa-lugar de concentración ou clasificación.

De acordo co anteriormente disposto, tras a consulta aos sectores pesqueiros e comercializador afectados, e en virtude das facultades que teño conferidas,

DISPOÑO:

CAPÍTULO I DISPOSICIÓNS XERAIS

Artigo 1º.-*Obxecto e ámbito.*

O obxecto desta orde é regular, no ámbito territorial da comunidade autónoma:

- a) A descarga e o transporte dos produtos pesqueiros frescos e da acuicultura ata a primeira venda na lonxa ou centro de venda autorizado.
- b) O transporte de moluscos bivalvos, equinodermos, tunicados e gasterópodos mariños vivos a partir da zona de produción ou a partir dun establecemento de acuicultura ata un centro de expedición ou de depuración, unha zona de reinstalación ou un establecemento de transformación.

Artigo 2º.-*Expedición de documentos e comunicación de datos.*

1. A Administración porá á disposición dos usuarios dos documentos aos que se refire esta orde as aplicacións informáticas necesarias para facilitar a súa expedición, rexistro e comunicación á consellería competente en materia de pesca.

2. Unha vez expedidos os documentos regulados nesta orde, remitíranse nun prazo máximo de 48 horas ao Servizo de Mercado da Pesca da Dirección Xeral de Estructuras e Mercados da Pesca.

3. De todos os documentos regulados nesta orde, tanto o responsable da súa expedición como o receptor dos lotes deberán gardar unha copia deles durante, polo menos, un período de doce meses a partir da súa expedición ou recepción.

CAPÍTULO II

DESCARGA E TRANSPORTE DOS PRODUTOS PESQUEIROS FRESCOS

Artigo 3º.-*Documento de transporte.*

1. Efectuada a descarga, procederase á venda na lonxa ou centro de venda do porto de descarga. Non obstante, se o propietario das especies descargadas decide vendelas nunha lonxa ou centro de venda distinto do porto de descarga, poderá facer o transporte das devanditas especies por vía terrestre ata a lonxa ou centro de venda de destino, coa obtención previa do documento de transporte que expedirá a entidade xestora do lugar autorizado para a descarga.

2. O transportista solicitará na entidade concesionaria do establecemento de primeira venda do porto onde se efectúe a descarga un documento de transporte que acompañe estes produtos durante o seu traslado.

3. Este documento conterá os datos que se relacionan no anexo I.

4. Non se exixirá este documento cando o transporte se realice dentro do recinto portuario.

5. O transportista é o responsable de entregarlle unha copia do documento de transporte á persoa responsable da entidade concesionaria da lonxa ou centro de venda de destino, a cal comprobará a súa veracidade e rexistrará a súa entrada.

6. No caso das importacións non realizadas por barco, indicarase o lugar en que se realizou o devandito envío e o nome do consignatario.

Artigo 4º.-*Declaración de recollida.*

1. Cando os produtos pesqueiros desembarcados ou descargados non se poñan á venda ou se destinen a unha posta en venda ulterior ou aprazada, o seu propietario ou o seu representante cubrirá o documento de declaración de recollida, que lle solicitará á entidade concesionaria da lonxa ou do centro de venda.

2. A declaración de recollida deberá conter os datos que figuran no anexo II.

3. Cando a comercialización dos produtos pesqueiros frescos for obxecto dun prezo contractual ou dun prezo a tanto alzado fixado para un período de tempo determinado, o propietario dos produtos ou o seu representante deberán cubrir o documento-declaración de recollida, sen prexuízo da presentación da nota de venda, unha vez que esta se formalice.

CAPÍTULO III

TRANSPORTE DOS MOLUSCOS BIVALVOS VIVOS, EQUINODERMOS, TUNICADOS E GASTERÓPODOS MARIÑOS VIVOS

Artigo 5º.-*Grupos afectados.*

Este capítulo aplicarase aos moluscos bivalvos, equinodermos, tunicados e gasterópodos mariños vivos, coa excepción das disposicións relativas á depuración que só se aplicarán aos moluscos bivalvos.

Artigo 6º.-*Documento de orixe.*

Cando se transporten ou trasladen moluscos bivalvos, equinodermos, tunicados e gasterópodos mariños vivos desde a zona de produción ata a lonxa-lugar de concentración ou clasificación, acompañar-

anse dun documento de orixe que conteña os datos que se recollen no anexo III.

Artigo 7º.-*Documento de rexistro para o transporte de moluscos bivalvos, equinodermos, tunicados e gasterópodos mariños vivos.*

1. Cando se transporte ou traslade un lote de moluscos bivalvos, equinodermos, tunicados e gasterópodos mariños vivos entre establecementos ou a partir da zona de produción ata un centro de expedición, un centro de depuración, unha zona de reinstalación ou un establecemento de transformación, deberá ir acompañado, sen prexuízo dos requisitos da normativa sobre sanidade animal, dun documento de rexistro orixinal.

2. O documento de rexistro deberá estar redactado cando menos nunha lingua oficial do Estado membro en que estea situado o establecemento de recepción. No anexo IV detállase o seu contido.

3. Este documento terá unha validez de cinco días a partir da súa data de expedición.

4. Os documentos de rexistro serán expedidos, por petición do recolector ou produtor, polas organizacións de produtores, confrarías de mariñeiros, entidades asociativas do sector produtivo legalmente constituídas, entidades concesionarias dos centros de venda e, se é o caso, polos titulares de establecementos de cultivos mariños.

5. Os titulares de viveiros e parques de cultivo de moluscos bivalvos terán que estar en posesión do documento de orixe de moluscos bivalvos vivos, a que fai referencia o artigo 6, durante os labores de recollida e traslado a porto do produto. O posterior traslado, por vía terrestre, ata o establecemento de destino deberá sempre ir amparado polo documento de rexistro correspondente.

6. As persoas físicas ou xurídicas que expidan os documentos serán responsables da veracidade dos datos que conteñan os devanditos documentos.

7. No caso de peche temporal dunha zona de produción e de reinstalación, as entidades encargadas da expedición do documento de rexistro deixarán de expedir documentos para esa zona.

Artigo 8º.-*Das obrigas das entidades de destino.*

1. Os centros de destino aceptarán só os lotes de moluscos bivalvos vivos que vaian acompañados do documento de rexistro.

2. No momento da entrega dun lote de moluscos bivalvos, equinodermos, tunicados e gasterópodos mariños vivos na entidade de destino, deberá estamparse a data de entrega no documento de rexistro correspondente.

Disposicións adicionais

Primeira.-Se a expedición dos documentos a que se refire esta orde representa, para o produtor, unha carga administrativa e financeira desproporcionada en relación co seu volume de produción, poderán solicitar, de acordo co modelo do anexo V, a autorización

para a expedición destes documentos mediante o uso de talonarios.

Segunda.-Cando unha embarcación estea autorizada para desenvolver actividade pesqueira nocturna e realice desembarques en horario de inactividade da lonxa, o titular do permiso de explotación da embarcación solicitará, previamente á saída de porto, a emisión dun documento de transporte que recolla as especies habituais de captura.

O transportista soamente encherá os espazos destinados a cantidades, sen que o documento presente emendas ou riscadas que invalidarán este documento.

Terceira.-As infraccións ao disposto nesta orde poderán dar lugar á incoación do correspondente expediente sancionador, de acordo coa Lei 8/2004, do 30 de xullo, de protección, control, infraccións e sancións en materia marítimo-pesqueira de Galicia.

Cuarta.-No caso de que os produtos pesqueiros sexan vendidos de acordo con calquera das modalidades de venda previstas, e se transporten a un lugar distinto do de desembarque ou descarga, o transportista deberá probar en todo momento a transacción efectuada, mediante copia da nota de primeira venda, albará ou outro documento que o acredite, incluíndo a factura.

Quinta.-No caso de produtos pesqueiros frescos que teñan que pasar un punto de control, de acordo co plan de explotación correspondente, a mercadoría non poderá ser retirada deste punto polo mesmo propietario da entrega.

Sexta.-O documento de transporte, regulado no artigo 4º desta orde terá a mesma validez e producirá os mesmos efectos que a guía de descarga regulada no Decreto 419/1993, do 17 de decembro, polo que se refunde a normativa vixente sobre descarga, primeira venda e comercialización dos recursos mariños en fresco, modificado polo Decreto 101/2006, do 8 de xuño.

Sétima.-No caso de que os moluscos bivalvos, tunicados, equinodermos ou gasterópodos mariños vivos sexan recolectados en bancos naturais da mesma zona de produción por titulares de permisos de explotación e sexan trasladados aos establecementos de destino sen diferenciar o produtor, poderán substituír, no documento de rexistro, o nome do recolector polo do representante, tras a solicitude por escrito e autorización por parte da consellería competente en materia de pesca.

Disposiciones derogatorias

Primeira.-Quedan derogadas todas as disposicións de igual ou inferior rango que se opoñan ao establecido nesta orde e, en especial, a Orde do 5 de novembro de 2004 pola que se regula o control da descarga e do transporte dos produtos pesqueiros frescos e da acuicultura ata a fase de primeira venda e o transporte de moluscos bivalvos vivos.

Disposicións derradeiras

Primeira.-Autorízase o director xeral de Estruturas e Mercados da Pesca para ditar as disposicións necesarias para o desenvolvemento desta orde.

Segunda.-Esta orde entrará en vigor aos tres meses da súa publicación no *Diario Oficial de Galicia*.

Santiago de Compostela, 8 de febreiro de 2008.

Camén Gallego Calvar
Conselleira de Pesca e Asuntos Marítimos

ANEXO I

Documento de transporte

* No caso de buques pesqueiros:

-Identificación do lugar e data da descarga:

Data da descarga.

Porto e lonxa ou centro de descarga.

Entidade concesionaria: CIF, enderezo e teléfono.

-Identificación do buque:

Nome, marcas de identificación externa e pavillón do buque para os produtos desembarcados procedentes de buques comunitarios e número interno do buque que figura no Rexistro Comunitario de Buques de Pesca, de ser o caso.

Nome, marcas de identificación externa, indicativo internacional de radio e pavillón do buque para os produtos desembarcados procedentes de buques de terceiros países.

Armador ou capitán do buque.

-Identificación do transportista:

Nome ou razón social, NIF e matrícula do vehículo.

-Identificación da lonxa ou centro de venda destino da mercadoría.

-Identificación das especies transportadas:

Zona xeográfica de captura.

Denominación científica e comercial de cada especie.

Cantidade de cada especie expresada en quilos.

* No caso de mariscador:

-Identificación do lugar e data da descarga:

Data da descarga.

Porto e lonxa ou centro de descarga.

Entidade concesionaria: CIF, enderezo e teléfono.

-Identificación do mariscador:

Nome, NIF e nº de permiso de explotación.

-Identificación do transportista:

Nome ou razón social, NIF e matrícula do vehículo.

-Identificación do centro de destino da mercadoría.

-Identificación das especies transportadas:

Zona xeográfica de captura.

Denominación científica e comercial de cada especie.

Cantidade de cada especie expresada en quilos.

* No caso dun establecemento de acuicultura:

-Identificación do lugar e data da descarga:

Data da descarga.

Lugar de descarga.
 -Identificación do produtor:
 Nome, NIF.
 Identificación do establecemento de acuicultura.
 -Identificación do transportista:
 Nome ou razón social, NIF e matrícula do vehículo.
 -Identificación do centro de venda destino da mercadoría.
 -Identificación das especies transportadas:
 Zona xeográfica de produción.
 Denominación científica e comercial de cada especie.
 Cantidade de cada especie expresada en quilos.

ANEXO II

Declaración de recollida

-Identificación do lugar e data da descarga:
 Data da descarga.
 Porto e lonxa ou centro de descarga.
 Entidade concesionaria: CIF, enderezo e teléfono.
 -Identificación do buque:
 Nome, marcas de identificación externa e pavillón do buque para os produtos desembarcados procedentes de buques comunitarios e número interno do buque que figura no Rexistro Comunitario de Buques de Pesca, de ser o caso.
 Nome, marcas de identificación externa, indicativo internacional de radio e pavillón do buque para os produtos desembarcados procedentes de buques de terceiros países.
 Armador ou capitán do buque.
 -Identificación do mariscador:
 Nome, NIF e nº de permiso de explotación.
 -Identificación das especies:
 Zona xeográfica de captura.
 Denominación científica e comercial de cada especie.
 Cantidade de cada especie expresada en quilos.
 -Identificación do lugar ou lugares onde a mercadoría está almacenada, de ser o caso, referencia ao documento de transporte ou ao documento T2M correspondente.

ANEXO III

Documento de orixe

* En todos os casos deberá conter a seguinte información:
 -Entidade responsable da emisión do documento de orixe:
 Nome da entidade.
 Enderezo e teléfono.
 NIF ou CIF.
 -Identificación do lugar e data de recolección:
 Data da recolección.

Lugar.
 -Zona xeográfica de produción:
 Clasificación GAL.
 Cualificación sanitaria.
 Zona ou subzona de control de biotoxinas.
 -Identificación das especies transportadas:
 Denominación científica e comercial de cada especie.
 Cantidade de cada especie expresada en quilos.
 -Destino do lote:

ANEXO IV

Documento de rexistro para o transporte de moluscos bivalvos, equinodermos, tunicados e gasterópodos mariños vivos

* Respecto dun lote enviado desde una zona de produción, debe incluír, como mínimo, a seguinte información:
 -Identidade e enderezo do recolector ou produtor.
 -Data de recolección.
 -Localización da zona de produción, mediante o número de código que se establece na norma pola que se clasifican as zonas de produción.
 Cualificación sanitaria.
 Zona ou subzona de control de biotoxina.
 -Denominación científica e comercial de cada especie.
 -Cantidade de cada especie expresada en quilos.
 -Destino do lote.
 * Respecto dun lote de moluscos bivalvos vivos enviado desde una zona de reinstalación, o documento de rexistro incluír a seguinte información:
 -Identidade e enderezo do recolector ou produtor.
 -Situación da zona de reinstalación.
 -Duración da reinstalación indicando a data de entrada na zona.
 * Respecto dun lote de moluscos bivalvos vivos enviados desde un centro de depuración, o documento de rexistro incluír a seguinte información:
 -Identidade e enderezo do recolector ou produtor.
 -Enderezo do centro de depuración.
 -Duración da depuración.
 -Datos nas cales o lote entrou no centro de depuración e saíu del.



XUNTA DE GALICIA
 CONSELLERÍA DESCA
 E ASUNTOS MARÍTIMOS

ANEXO V

PROCEDEMENTO AUTORIZACIÓN PARA A EXPEDICIÓN DE DOCUMENTOS POR MEDIO DE TALONARIOS	CÓDIGO DO PROCEDEMENTO PE403F	DOCUMENTO SOLICITUDE
---	---	--------------------------------

DATOS DO/A SOLICITANTE

NOME E APELIDOS / RAZÓN SOCIAL		CIF / NIF	
ENDEREZO		PROVINCIA	CONCELLO
LOCALIDADE	CÓDIGO POSTAL	TELÉFONO	FAX
CORREO ELECTRÓNICO			

E, na súa representación:

NOME E APELIDOS/RAZÓN SOCIAL		CIF/NIF	
ENDEREZO		PROVINCIA	CONCELLO
LOCALIDADE	CÓDIGO POSTAL	TELÉFONO	FAX
CORREO ELECTRÓNICO			

DATOS DO ESTABLECEMENTO

NOME	LOCALIZACIÓN
CÓDIGO DE AUTORIZACIÓN DO ESTABLECEMENTO PARA A PRIMEIRA VENDA	

A esta solicitude xuntaráselle a seguinte documentación indicada (sinálese cun "X")

<input type="checkbox"/> Declaración xurada de non dispor de elementos técnicos que permitan a elaboración de documentos.
<input type="checkbox"/> Informe ou declaración do volume de vendas do establecemento do ano inmediatamente anterior ao da solicitude en cantidades (kg) e importes (€).

A persoa que abaixo asina, no seu propio nome ou no da entidade representada, faise plenamente responsable da veracidade de todos os datos consignados.

LEXISLACIÓN APLICABLE - Orde do 8 de febreiro de 2008 pola que se regula o control da descarga e do transporte dos produtos pesqueiros frescos ata a fase de primeira venda e o transporte de moluscos bivalvos, equinodermos, tunicados e gasterópodos mariños vivos. - Orde do 27 de maio de 2007 pola que se regula a descarga, transporte e primeira venda dos produtos pesqueiros e acuícolas dos que non sexa obriga a súa primeira venda en lonxa.	(A cubrir pola Administración) RECIBIDO REVISADO E CONFORME	NÚMERO DE EXPEDIENTE DATA DE ENTRADA DATA DE EFECTOS DATA DE SAÍDA
SINATURA DO/A SOLICITANTE OU PERSOA QUE O REPRESENTA Lugar e data , de 200		